

# INUIT ATAQATIGIIT

## Inatsisartuni



UKA 2018/27  
Ulloq 16.11.18  
Mimi Karlsen

**Inuit nappaammik eqqorneqarsimasut oqaaseqartartoqalersinnaanerat pillugu apeqquteqaat aallaavigalugu oqallinnissamik siunnersuut.**

**(Inatsisartunut ilaasortaq Jess Svane, Siumut)**

Naalackersuinikkut innuttaasut qitiutillugit ingerlatsissaagut. Inuk ilivitsoq isiginiarneqassaaq. Tamanna isumaqarpoq naalackersuinikkut qaffasinnerpaamit suliassaqarfiit akimorlugit ataqatigiissaarineq ingerlanneqassasoq. Inunnik sullissiveqarfiit ataqatigiissaagaassapput, innuttaasut sullinneqartut atorfissaqartitaat ilisimaaralugit sullissineq ilivitsoq ingerlallugu.

Taama Inuit Ataqatigiit anguniakkatsinni allaqqavoq. Isumaqarpuguttaaq nappaarsimasut sullinneqarneri taama ingelanneqartassasut attaveqatigiinnererup pitsaasuujuaannarnissaa aamma isumagineqartariaqarput, napparsimasunummi tamanut ilaquuttat tassaagajupput ajorunnaarnissamut aqutaalluarnersaasartut. Taakku artorsartinneqarunik napparsimasumut ikorfartuisinnaanerak killeqalersarpoq.

Inuk napparsimalersoq nappaataanik, timaaniittumik katsorsarneqartarpoq. Pingaartorujussuuvorli inuup napparsimasup ilivitsuutillugu sullinnissaa. Timikkut napparsimaneq, soorlu kræfteqarneq, uummallunneq gigternerluunniit katsorsarniarneqarpata, taava timi kisiat pinnagu, tarneq anersaarlu aamma isumagineqartariaqarput. Timikkut napparsimanagerup nassatariuaannarpaa misgissutsikkut, tarnikkut, artorsarneq. Timikkut napparsimagaanni katsorsartillunilu pingaaruteqarpoq aamma misigissutsikkut ikiorneqarnissaaq, tamannalu napparsimaveqarfitsinni pimoorunneqarnerusaraqarpoq, tassa inuk ilivitsuutillugu sullissineq.

Oqallisissiertup taavaa inuit napaarsimaveqarfik pillugu naammagittaalliutaat amerligaluttuinnartut, maalaarutit amerlasuujusut. Inuit peqqinnissaqarfimmi sullinneqarnertik naammagissappassuk napparsimasup nakorsallu akornanni ersarissumik isumaqatigiittoqartariaqarpoq. Nakorsap nakorsiaq iperartinagu aperisariaqarpaa sullinneqarnini qanoq igineraa, naammaginngippagulu nakorsaq iliuuseqaqqittariaqarpoq. Soorlu allani sullissivinni sullinneqaraangatta aperineqarsinaasarpugut sullinneqarnerput ajunnginnersoq. Peqqinnisarfirmittaaq tamanna atuuttariaqarpoq.

Nakorsat napparsimasullu akornann qulakkeerniartariaqarparput.

Napparsimasut sullilluarneqarnissaat ilivitsuunerusumik naammassissagutsigu napparsimavinni inunnik isumaginnittumik atorfeqartitsisinnaanissaq pitsaassagaluaqaaq. Inuk napparsimatilluni isumassuinissamik sapilertarpoq, ikiortissarsiornissamulluunniit nukissaalatsilersinnaalluni. Taamaammat pitsaassagaluaqaaq inunnik isumaginnittumik napparsimaveqarfimmi sulisoqalisinnaasuuppat. Tassa tamakkuusinnaapput nakorsiat iluamik sullinneqarnerisigut pitsannguutaasinnaasut.

Pitsannguutaasinnaasut sullissisinnaasullu aamma tassaapput napparsimasut peqatigiiffii. Peqatigiiffiit, kattuffiit pitsaasumik ingerlagunik napparsimasunik siunnersuisinaanerit, aqutissiuussisinaanerit ingerlannerusinnaavaat, soorlu Neriuffik, Kræftens bekæmpelse allallu tassaapput napparsimasut, napparsimaviullu ilisimasaannik katersisinnaasut, taamaalillutillu napparsimasut sinnerlugit oqariartuuteqarsinnaasut. Napparsimasut peqatigiiffiisa nukittorsarnerisiguttaaq napparsimasut oqariartuunneqartarnerat pitsanngorsarsinnaavarput.

Inuit Ataqtigiinittaaq isumaqarpugut napparsimasut sanngiillisut oqariartortoqartariaqartut, tamannalu assigiinngitsutigut anguniarneqarsinnaasoq.

Qujavugut oqallisissiakkut napparsimasut atugaasa pitsanngorsarnissaannut oqaloqataasinnaagatta.